

Image not found

<https://lirica-medievale-romanza.org/sites/all/themes/business/logo.png>

Lirica Medievale Romanza

Published on *Lirica Medievale Romanza* (<https://letteraturaeuropea.let.uniroma1.it>)

Home > CONON DE BETHUNE > EDIZIONE > L'autrier un jor après la Saint Denise > Edizioni > Wallensköld

Wallensköld

I.

L'autrier un jor après la Saint Denise
Fui a Betune, ou j'ai est sovent.
La me sosvint de gent de male guise
Ki m'ont mis sus mençoigne a entient:
Ke j'ai chanté des dames laidement;
Mais il n'ont pas ma chanson bien aprise:
Je n'en chantai fors d'une solement,
Qui bien forfist ke venjance en fu prise.

II.

Si n'est pas drois ke on me desconfise,
Et vous dirai bien par raison coment:
Car se on fait d'un fort larron justise.
Doit il desplaie as loiaus de noient?
Nenil, par Diu! qui raison i entent;
Mais la raisons est si arriere mise
Ke çou c'on doit loer blasment la gent
Et loent çou que nus autres ne prise.

III.

Dame, lonc tans ai fait vostre servise,
La merci Deu! c'or n'en ai mais talant,
Que m'est ou cuer une autre amor assise
Que me requiert et alume et esprant
Et me semont d'amer si hatement,
C'an li n'en a ne orgoil ne faintise;
Et jel ferai, ne puet estre autrement,
Si me metrai dou tout an sa franchise.

IV.

A la millor del roiaume de France,
Voire del mont, ai mon cuer atorné,
Et non por quant pavor ai et dotance
Ke sa valors ne me tiegne en vilté,
Car tant redoc orgelleuse beauté;
Et Dieus m'en doinst trover bone esperance,
K'en tot le mont n'a orgoill ne fierté
K'Amors ne puist plaissier par sa poissance.

- letto 435 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld-3>